

有子之言似夫子檀弓上

礼 记

有子问于曾子曰、问作丧去声、于夫子乎。仕而失位曰丧。曰、闻之矣。丧欲速贫、

死欲速朽。上只问丧、此又带出死字来、遂成一篇对待文字。有子曰、是非君子之言也。辨。曾子曰、参也闻

诸夫子也。证。一有子又曰、是非君子之言也。又一辨。曾子曰、参也与子游闻

之。又二证。有子曰、然。信有是言。然则夫子有为去声、言之也。开一解、伏末二段。曾子以斯言告

于子游。子游曰、甚哉有子之言似夫子也。平日门人皆以有子之言为似夫子、故子游叹其甚。昔者夫子居于

宋、见桓司马即桓魋、自为石椁、三年而不成、夫子曰、若是其靡也、死不

如速朽之愈也。靡、侈也。死之欲速朽、为桓司马言之也。速朽之言有为。南宫敬叔鲁大夫、孟僖子之

子仲孙阅。反、失位去鲁而反国。必载宝而朝、欲行赂以求复位。夫子曰、若是其货也、丧不如速贫之愈

也。丧之欲速贫、为敬叔言之也。速贫之言有为。曾子以子游之言告于有子。有

子曰、然。

言果有

吾固曰非夫子之言也。

复一句、结上生下。

曾子曰、子何以知之。有

子曰、夫子制于中都、四寸之棺、五寸之槨。

定公九年、孔子为中都宰、制棺槨之法制。

以斯知不欲

速朽也。

以有棺槨之制、知速朽非夫子之言。

昔者夫子失鲁司寇、将之荆、盖先之以子夏、又申

之以冉有。

荆、楚本号。将适楚、而先使二子继往者、盖欲观楚之可仕与否、而谋其可处之位。

以斯知不欲速贫也。

以有行使之资、知速贫非夫子之言。

前二段、子游解欲速朽速贫之故。后二段、有子自言所以知其不欲速朽速贫之故。章法极整练、又极玲珑。